



IKIGO CY'IGIHUGU CYO KUBUNGABUNGA IBIDUKIKIJE (REMA)

Repubulika y'u Rwanda



IBIBAZO UKUNZE KWIBAZA

ITEGEKO RIBUZA AMASASHI N'IZINDI PULASITIKI ZIKORESHWA INSHURO IMWE

Pulasitiki ikoreshwa inshuro imwe ni iki?

Igikoresho icyo aricyo cyose gikoze muri pulasitiki gikoreshwa rimwe gusa mbere y'uko gitabwa cyangwa kinagurwa

Ni izihe pulasitiki zibujije?

Ibuza rireba amasashi yose n'izindi pulasitiki zikoreshwa inshuro imwe nk'ibipfunyiko by'ibiryo/ibikoresho bikoreshwa inshuro imwe bapfunyikamo, imiheha, ibikoresho byifashishwa mu kuvanga, amafurusheti, ibiyiko, ibyuma, ibikombe n'amasahani bikoreshwa inshuro imwe, ibipfunyiko by'ibiryo, ibipirizo n'ububiko bw'imparapo bikoze muri pulasitiki

Isashi ya pulasitiki ni iki?

Ni isashi yose, hatitawe ku mubyimba wayo cyangwa ibara, yifashishwa mu gupfunyika mu mahahiro rusange, mu maduka adandaza, mu maduka manini cyangwa amahahiro y'ibiribwa

Ni izihe ngaruka zituruka ku ikoreshwa ry'ibikoresho bya pulasitiki ikoreshwa inshuro imwe?

Amasashi amwe atwarwa n'umuyaga mu buryo bworoshye agatera umwanda, agafunga inzira z'amazi, akagabanya ubushobozzi bw'amazi bwo kwinjira mu butaka, bityo bigatera imyuzure. Inyinshi muri pulasitiki zikoreshwa inshuro imwe zikorwa mu mavuta na gazi karemano zikaba zitabora burundi, ahubwo zikunze kugaragara mu bidukikije nk'uduce duto duto rimwe na rimwe tutaboneshwa amaso, tugira uruhare mu gutera umwanda, kwanduza ibiribwa, n'ibindi.

Ese pulasitiki zifashishwa n'inganda nk'ibipfunyiko by'ibanze nazo zirabujije muri iri tegeko?

Oya. Pulasitiki zikoreshwa n'inganda mu gupfunyika zisonewe gupfunyikishwa ibicuruzwa bikorerwa mu ruganda. Ariko zigomba gushyirwaho ikimenyetso kigaragara n'uruganda ruzipfunyikisha ibicuruzwa byarwo.

Gukora amasashi n'ibikoresho bya pulasitiki bikoreshwa rimwe byo kohereza hanze biremewe?

NHoya, uretse iyo zikenewe mu gupfunyika ibyakorewe muri urwo ruganda

Abadandaza bemerewe kurangiza ibikoresho bya pulasitiki ikoreshwa rimwe bafite mu bubiko?

Yego. Abadandaza ibikoresho bya pulasitiki bikoreshwa inshuro imwe bemerewe kubirangiza mu bubiko bwabo ariko basabwe kubanza kubimenyekanisha ku Kigo cy'Igihugu cyo Kubungabunga Ibidukikije (REMA) mu gihe kitarenze icyumweru kimwe iri tegeko risohotse mu lgazeti ya Leta.

Ese hari isonerwa riteganyijwe ku macupa ya pulasitiki akoze muri "PET"?

Ikoreshwa ry'amacupa ya pulasitiki akoze muri "PET" riremewe iyo byasabiwe uruhushya muri REMA. Amakuru ku buryo bwo gusaba uruhushya mwayasanga mu mabwiriza agena isonerwa, ku rubuga rwa REMA – www.rema.gov.rw

Ese hari isonerwa riteganyirije amasashi?

Yego. Amasashi akoze muri pulasitiki ibora cyangwa "woven polypropylene" (10x10 no kuzamura) arasonewe.

Ese ni kuki amasashi akoze muri pulasitiki ibora na "woven polypropylene" asonewe?

Amasashi akoze muri pulasitiki ibora ntawo akenera imiterere idasanzwe y'aho ashyizwe ngo abore, ahubwo arabora mu miterere isanzwe bityo ntiyangize ibidukikije. "Woven polypropylene" ishabora gukoreshwa inshuro nyinshi mu miterere yayo, bityo ntawo igira uruhare mu gutera umwanda.

Ese amasashi akoze muri pulasitiki itari "woven" arabujije?

Yego. Amasashi akoze muri pulasitiki itari "woven" arabujije kuko adashobora kunagurwa mu buryo bworoshye

Ese ikoreshwa rya pulasitiki za "Oxo-biodegradable" riremewe?

Hoya. Pulasitiki za "Oxo-degradable" zizwi nka pulasitiki zibora hifashishjwe ogusijeni (oxo-biodegradable), ingufu z'imirasire (photo-biodegradable), ubushyuhe (thermo-degradable), zicagagurika hifashishjwe ogusijeni (oxo-fragmentable), cyangwa hongewemo "pro-oxidant" zirabujije. Ubushakashatsi bwagaragaje ko izi pulasitiki zicagagurikamo uduce duto tutaboneshwa amaso tugira ingaruka ku bidukikije n'ubuzima.

Ese amasashe apfunyikwamo mu mahahiro yo ku bibuga by'indege aremewe?

Yego. Amahahiro yo ku bibuga by'indege ntarebwa n'ibuzwa ry'ikoreshwa ry'amasashi n'ubwo byemewe gusa imbere muri ayo mahahiro. Gusa ntashobora gukwirakwizwa hagamijwe kuyacuruza cyangwa gukoreshwa ku isoko ryo mu Rwanda. Umugenzi wese uje mu Rwanda afite isashi yakuye muri ayo mahahiro asabwe kuyishyingura akigera aho yururukira cyangwa akayisiga mu ndege mbere yo kururuka.